

Četrdeset i drugi broj časopisa *Novi Muallim* izlazi neposredno pred 11. juli 2010. godine, kada se bosanskohercegovačka, evropska i svjetska javnost spremaju obilježiti petnaestu godišnjicu genocida u Srebrenici, tragediju kozmičkih razmjera koja je postala, ili je trebala postati, simbolom najvećeg stradanja jednog naroda na tlu Evrope nakon Drugog svjetskog rata i lekcija iz koje smo morali mnogo naučiti kako se ne bi ponovila. Priča o Srebrenici ne smije postati prigodničarska niti se smije završiti na manifestacijskoj i memorijalnoj ravni. Naše učenje iz "priče o Srebrenici" moralo bi imati svoj kontinuitet. *Novi Muallim* na stranicama ovoga broja tematizira pitanje Srebrenice hutbama naših aktivnih imama i hatiba Nedžada ef. Osmića i Damira ef. Peštalića i analizama i recenzijama dr. Dževada Hodžića i Mehe ef. Šljive. Jer, Srebrenica jeste paradigma stradanja Bošnjaka, ali je istovremeno i ogledalo u kojemu možemo vidjeti svoje lice i svoje naličje. Jesmo li prošli ili smo pali na ispitu koji se zove moral, solidarnost, odgovornost...? Ili je, kako je to na desetogodišnjicu genocida u Srebrenici kazao prof. dr. Rešid Hafizović, a stanje se nije promijenilo ni petnaest godina poslije, "Srebrenica već postala neugodan svjedok, ne toliko za one koji su ondje zločin počinili ili za one koji su ga sa daljih ili bližih zemljovidnih distanci planirali i pomagali, već za one koji su srebreničkom žrtvom do sada trebali, a nisu, na neizbrisiv način žigosati savjest svakog čovjeka na planeti bio on kriv ili nedužan...".

Stoga, potaknuti ovakvim razmišljanjima pozivamo sve nas na odgovornost, na samokritiku i preispitivanje šta je svako od nas ponaosob uradio za Srebrenicu? Dolaze nove generacije koje povijest ove zemlje uče iz udžbenika u kojima nema nijedne riječi o srebreničkom genocidu, o agresiji, o prognanim, silovanim... Povijest Bosne i Hercegovine završava se informacijom o njenom međunarodnom priznanju i konstatacijom da je nošena ratnim olujama ostala bez 200.000 stanovnika. Najveći broj stanovnika Bosne i Hercegovine još nikad nije posjetio mezarje u Potočarima. Našim prijateljima i turistima iz Turske, Irana i drugih dijelova svijeta to se ne može desiti. Pohvalna je inicijativa manjeg broja škola koje organiziraju jednodnevne izlete i časove povijesti u Potočarima, ali to još nije postala jedna lijepa navika. Naša je dužnost da se institucionalno čuva sjećanje na Srebrenicu i na sva druga mjesta velikih stradanja kojih nije pošteđen nijedan dio Bosne i Hercegovine. U protivnom, Srebrenica se može i ponoviti jer nas njene rane još nisu ujedinile i potaknule na solidarnost.

Uz ovu temu, koju s razlogom izdvajamo na prvo mjesto, u rubrici FORUM, u ovom broju posvećenoj vjeronauci i pitanju udruživanja vjeroučitelja, pišu Nezir Halilović, Samir Dedić, Zijad Okanović, Bekir Šabić i Emir Džambegović.

U rubrici PUTOKAZI hfz. Mevludin Dizdarević pokušava osvjetliti intelektualnu zaostavštinu Mustafe Busuladžića s posebnim akcentom na njegovu kulturalnu interpretaciju islama.

Rubrika SAGLEDAVANJA nudi riznicu tekstova prezentiranih na Okruglom stolu o temi *Bošnjačko razumijevanje islama u XX stoljeću*, koji je u organizaciji Fakulteta islamskih nauka u Sarajevu i Udruženja Ilmijje IZ-e u BiH održan 24. maja 2010. Radove potpisuju dr. Fikret Karčić, dr. Enes Karić, Mustafa ef. Spahić, dr. Fuad Sedić, dr. Samir Beglerović, dr. Harun Hadžić, mr. Behija Durmišević i dr. Dževad Hodžić.

Zanimljivi radovi popunjavaju rubrike MUALLIM, MUALLIMOV ESEJ I PREGLED, a od ovog broja preporučujemo vam i novu rubriku MUALLIMOV INTERVJU. S Ianom Almond, profesorom postkolonijalne književnosti na George State University u Atlanti družili su se i razgovarali Mirza Sarajkić i Samedin Kadić. Prof. Almond je "ljut zbog strateškog iskorištavanja pojma islam", što ga je ponukalo da zaviri u historijske izvore i raskrinka brojne stereotipe o islamu. Neka to bude poticaj i nama za pronicanje u našu povijest, u kojoj je Srebrenica nezaobilazna dionica.

Ne dopustimo da petnaesta godišnjica genocida u Srebrenici prođe u sjeni aktualnog svjetskog prvenstva u fudbalu.